


Riba Internet tin 1.1 miyon hits pa Aruba Esso News



ORANJESTAD (AAN): Digital Library of the Caribbean (dLOC) ta sigui crece y sostene estudionan Caribense. E website ta provee acceso na mas cu 2 miyon di pagina di contenido y ta registra mas o menos un 1.5 miyon bishita pa luna.

E ultimo aña dLOC a agrega casi 160.000 pagina

di contenido nobo danki na e sosten di dLOC su partnernan den Caribe, entre otro Biblioteca Nacional Aruba. E prome aporte di Biblioteca Nacional Aruba na e biblioteca digital aki ta Aruba Esso News. Na e ultimo reunion di ACURIL (Association of Caribbean University Research Insti-



tutional Libraries) na Bahamas, a duna reconocimiento cu Aruba Esso News a yega 1.1 miyon hits.

Un noticia cu ta yena Biblioteca Nacional Aruba, y en especial departamento Arubiana, cu hopi satisfaccion. E coleccion di Aruba

Esso News digitalisa ta casi completo. Na 2013 cu ayudo di Famia Lake, departamento Arubiana a digitalisa 2 aña di Esso News cu tabata falta. Ainda falta un par di luna di cuminsamento di aña 1945.

Ademas di e reconocimiento pa loke ta trata Aruba Esso News, a duna reconocimiento tambe na algun persona. Digital Library of the Caribbean su exito lo no tabata posibel sin e dedicacion di su partnernan y nan staf. Entre e personanan cu a haya reconocimiento ta señora Graciela Nedd-Cheng, documentalista na Biblioteca Nacional Aruba, trahando den departamento

Arubiana. Graciela a ricibi dos certificado, uno como premio di excelencia pa su persistencia y e otro como archivista digital. Biblioteca Nacional ta felicita Graciela cu e bunita reconocimientonan aki.

The Digital Library of the Caribbean (dLOC) ta un cooperativa di biblioteca digital di recursonan relaciona cu e cuenca di Caribe. dLOC ta ofrece acceso na versionnan digitalisa di material cultural, historico y di investigacion tocante Caribe, cu actualmente ta warda den archivonan, bibliotecanan y coleccionnan priva. Por bishita e website riba www.dloc.com.